

LA CONTA DOU RAT GABY (NADIA STEVENIN)



Eun rat, in passèn dezut una quianda, l'a stchanco-se la pel.

Nonca il va in tsou tchavatén : « Tchavatén , tchavatén , taccoouna-mé la pel qué èi stchanco-me in passèn dezut la quianda ».

Lou tchavatén i rarpouèn : « D'acôrt ! Ma dévàn porta-mé dé crén ».

Nonca lou rat il va in tsou peurc : « Peurc, peurc, doouna-mé dé crén da pourtor ou tchavatén ! Lou tchavatén mé taccoounerà la pel qué èi stchanco-me in passèn dezut la quianda ».

Lou peurc i rarpouèn : « D'acôrt ! Ma dévàn porta-mé dé farinna ».

Nonca lou rat il va in tsou mouliner : « Mouliner, mouliner, doouna-mé dé farinna da pourtor ou peurc ! Lou peurc mé doounerà dé crén da pourtor ou tchavatén é lou tchavatén mé taccoounerà la pel qué èi stchanco-me in passèn dezut la quianda ».

Lou mouliner i rarpouèn : « D'acôrt ! Ma dévàn porta-mé dé gran per for la farinna ».

Nonca lou rat il va in tsou tchamp : « Tchamp, tchamp doouna-mé dé gran da pourtor ou mouliner ! Lou mouliner mé doounerà la farinna da pourtor ou peurc , lou peurc mé doounerà dé crén da pourtor ou tchavatén é lou tchavatén mé taccoounerà la pel qué èi stchanco-me in passèn dezut la quianda ».

Lou tchamp i rarpouèn : « D'acôrt ! Ma dévàn porta-mé dé fimér per for cràsser lou gran ».

Nounca lou rat, dja lagnò, il va in tsé la votcha : « Votcha, votcha doouna-mé dé fimér da pourtor ou tchamp ! Lou tchamp mé doounerà lou gran da pourtor ou mouliner, lou mouliner mé doounerà la farinna da pourtor ou peurc, lou peurc mé doounerà dé crén da pourtor ou tchavatén é lou tchavatén mé taccoounerà la pel qué èi stchanco-me in passèn dezut la quianda ».

La votcha i rarpouèn : « D'acôrt! Ma dévàn porta-mé dé fen ».

Nonca lou rat sàmper più lagnò, il va in tsou pro : « Pro, pro doouna-mé dé fen da pourtor a la votcha ! La votcha mé doounerà dé fimér da pourtor ou tchamp, lou tchamp mé doounerà lou gran da pourtor ou mouliner, lou mouliner mé doounerà la farinna da pourtor ou peurc, lou peurc mé doounerà dé crén da pourtor ou tchavatén é lou tchavaten mé taccoounerà la pel qué èi stchanco-me in passèn dezut la quianda ».

Lou pro i rarpouèn : « D'acôrt ! Ma dévàn porta-mé l'èva per for cràsser l'erba.

Nonca lou rat bélébèn lagnò, il va ou reui : « Reui , reui, doouna-mé d'èva da pourtor ou pro ! lou pro mé doounerà dé fen da pourtor a la votcha, la votcha mé doounerà dé fimér da pourtor ou tchamp, lou tchamp mé doounerà lou gran da pourtor ou mouliner, lou mouliner mé doounerà la farinna da pourtor ou peurc, lou peurc mé doounerà dé crén da pourtor ou tchavatén é lou tchavatén mé taccoounerà la pel qué èi stchanco-me in passèn dezut la quianda »

Nonca lou reui il doouna l'èva ou rat qué la porta ou pro ;

lou pro i doouna lou fen é lou rat lou porta a la votcha ;

la votcha i doouna lou fimér é lou rat lou porta ou tchamp ;

lou tchamp i doouna lou gran é lou rat lou porta ou mouliner ;

lou mouliner i doouna la farinna é lou rat la porta ou peurc ;
lou peurc i doouna lou crén é lou rat lou porta ou tchavatén qué i tacoouna la pel qué l'a
stchanco-se in passèn dezut la quianda !